

XLVII

1305-V-18, Medina del Campo.—Al adelantado don Juan Osorez, maestre de Santiago. Sobre la indebida imposición de rotova que hacían algunos comendadores santiaguistas. (A.M.C., perg. 78).

Don Ferrando, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina, a uos, don Johan Osorez, por essa mesma gracia maestre de la orden de la caualleria de Santiago et adelantado por mi del regno de Murçia o a qualquier que tenga y uestro lugar et a qualquier que daqui adelante y fuere adelantado por mi, salut commo a aquellos que amo et de que mucho fio. Sepades que el conçeio de la noble çibdat de Murçia me enbiaron mostrar de commo ellos an franqueza por carta del rey don Alffonso mi auuelo que parayso aya que les yo confirme, que ningunos non tomen rotoua en ningun lugar del regno de Murçia saluo ende en el puerto de Mala Muger. Et que agora algunos de los castellers et otros omes del regno non queriendo les guardar la dicha franqueza que toman rotoua en La Losiella et en Medinatea et en Mula et en Libriella et en Alhama et en Totana et avn que el puerto de Mala Muger les toman mas que quanto diz la carta que ende tienen del dicho rey don Alffonso et de quanto fue vsado e acostunbrado en el tienpo del rey don Alffonso et del rey don Sancho asi a los christianos commo a moros et a judios et a uezinos et a estrannos, et que es cosa que torna a gran mio deseruiçio et a mengua de las mis rentas et a danno et despoamiento de la tierra. Esto non tengo yo por bien, porque uos mando vista esta mi carta que non consintades a ninguno que tome rotoua daqui adelante sinon en aquellos logares do el rey don Alffonso la mando tomar et tanto commo el manda et non mas, segun dizen las cartas que les dio en esta razon et les yo confirme: et qualquier o qualesquier que en otros logares la tomaren et de mas de quanto es ordenado, prendatlos por mill morauedis de la moneda nueva a cada vno et guardatlos para fazer dellos lo que yo mandare. Et non fagades ende al por ninguna manera; et desto les mande dar esta mi carta seellada con mi seello de çera colgado.

Dada en Medina del Campo, dieziocho dias de mayo, era de mill et trezientos et quareynta et tres annos. Yo Pero Ferrandez la fiz escriuir por mandado del rey. Vista, Relator.

